

319 plus avant qu'il lui seroit possible ; mais si ledit *Taiguragni* y vouloit aller, comme il avoit promis, qu'on lui feroit present de quoy il seroit content et grand' chere, et qu'ils ne feroient seulement qu'aller voir *Hochelaga*, puis retourner. A quoy répondit ledit *Taiguragni* qu'il n'iroit point. Lors se retirerent en leurs maisons.

Le lendemain, dix-septième dudit mois, ledit *Donnacona* et les autres revindrent comme devant, et apporterent force anguilles et autres poissons, duquel se fait grande pécherie audit fleuve, comme sera ci-apres dit. Et lors qu'ils furent arrivez devant nosdits navires, ils commencerent à danser et chanter comme ils avoient de coutume. Et apres qu'ils eurent ce fait, fit ledit *Donnacona* mettre tous ses gens d'un côté, et fit vn cerne sur le sablon, et fit mettre ledit Capitaine et ses gens, puis commença vne grande harangue tenant vne fille d'environ de l'aage de dix ans en l'une de ses mains, puis la vint presenter audit Capitaine, et lors toutes les gens dudit Seigneur se prindrent à faire trois cris en signe de joye et alliance, puis derechef presenta deux petits garçons de moindre aage l'un apres l'autre, desquels firent telz cris et ceremonies que devant. Duquel present fut ledit Seigneur par ledit Capitaine remercié. Et lors *Taiguragni* dit audit Capitaine que la fille estoit la propre fille de la sœur dudit Seigneur, et l'un des garçons frere de lui qui parloit; et qu'on les lui donnoit sur l'intention qu'il n'allat point || à *Hochelaga*. Lequel Capitaine répondit que si on les lui avoit donnés sur cette intention, qu'on les reprint, et que pour rien il ne laisseroit à aller audit *Hochelaga*, parce qu'il avoit

320